

# কিশোরদের মন

দক্ষিণারঞ্জন মিত্র মজুমদার



১৯৩৩

06/24/18 তারিখে উইকিসংকলন থেকে রপ্তানিকৃত

কিশোরদের

মন

কিশোর

উপন্যাস

শ্রীদক্ষিণারঞ্জন মিত্র মজুমদার

প্রবাসী কার্যালয়

কলিকাতা

---

প্রকাশক

শ্রীকেদারনাথ চট্টোপাধ্যায়

প্রবাসী কার্যালয়

১২০।২, আপার সার্কুলার রোড,

কলিকাতা

১৩৪০

আট আনা

প্রবাসী প্রেস

১২০।২, আপার সার্কুলার রোড, কলিকাতা

শ্রীমানিকচন্দ্র দাস কর্তৃক মুদ্রিত

কিশোর  
বাংলার

জ্যোৎস্না  
রাজ্যের

যাত্রাপথে

# ভূমিকা

কিশোরদের উপন্যাসের অক্ষর লিখতে, কালিটে নিতে হয় সব্জে'।

সেই ছোট ছোট উজ্জ্বল মানুষদের মন, যেন নূতন পাখা ওঠা পক্ষিরাজ ঘোড়ার পিঠে সওয়ার; তরোয়াল ঝক্‌মকিয়ে সবটা রাস্তা চম্‌কিয়ে তারা চলেছে!

শিশুদের মনকে প্রথমেই ভুলিয়ে দেওয়া যায়, লাল একটুকু অমল হাসি দিয়ে। ঘটনার দোলায় দুলিয়ে, কি, কল্পনার উধাও মেঘে ছোটদের একেবারে উড়িয়ে নেওয়া যায়!

কিন্তু বীর কিশোরেরা এক নিমিষে তরোয়াল দিয়ে কচ্ কচ্ করে এসব কেটে ফেলে দিতে পারে, তা-ই যদি তাদের ইচ্ছে হয়।

দিয়েই,

হয় ত ঙ্গ কুঁচিয়ে আধ হাসি সঙ্গে রেখে, তারা জিজ্ঞেস করবে,

“কি

এ?”

তখন সত্যিকারের রাজ্যের বাঁশী না বাজলে, তারা তাদের সদ্য ধারাল আলোর স্বর্ণপতাকা উড়িয়ে দিয়ে, সেইখানে তাদের যুদ্ধের বিউগল্ বাজিয়ে দেয়!

সজাগ কিশোরেরা এই রকমে তাদের চোক আর মন এই দুটো অমূল্য হীরের আলোতে, জগতের কিছুকেই হারিয়ে দিতে পেরেছে।

যা কিছু স্বপ্ন পৃথিবীতে আছে, আর যা কিছু স্বপ্ন রয়েছে কিশোরদের মনের ভিতর, সব তাদের কাছে হেরে গিয়ে, প্রতিদিন হয়ে উঠছে, সত্য। এবং সেই সত্যকে সবখানেই হতে হয়েছে রঙিন। তারই উপর দিয়ে জীবনের অমর পক্ষিরাজ ঘোড়া ছুটিয়ে চলে যাচ্ছে তারা!—সেই প্রফুল্ল, সুন্দর, অতুল, জীবন্ত কিশোরেরা!

তাদের জীবনের ইতিহাস আর উপন্যাস, এ দুই-ই মাথা তারি মধ্যে।  
তাজা সবুজে' রঙে।

কোনটি তারা ভালোবাসে?

তাদের হার আর জিৎ, ওরি ভিতরে দুটিই। তা তারা কখনও বেছে নিতে পারে না! নিতে না পারাটাই যেন তাদের অসীম আনন্দ! বেছে নিতে না পেরে, গাছের পাতা যেমন গাঢ় আর হালকা দু'রঙেরই উপর দিয়ে, ফুল হয়ে ওঠে ফুটে, এরাও তেমনি ফুটে ওঠে মানুষের ডুবনের আলোর ফুল হয়ে, সোণালি রঙে!

সেই কথার একটি ফোঁটা

এ বইয়ে।

বলবার জন্যে, যে—

খোলা পথে, নদীর ধারে, মাঠের বুকে, পাহাড় ডিঙিয়ে কিশোরদের

ঘোড়া ছুটে চলেছে; হীরের আলো জ্বলে উঠছে আঁধারের গায়ে গায়ে। বিমল  
আর সুবিনয় ফিরে দাঁড়িয়ে দেখছে—তাদের সাথীদের কার কার ঘোড়া ছুটে  
আসছে!

শ্রীদক্ষিণারঞ্জন মিত্র মজুমদার

সাহিত্যপ্রম  
লেক রোড

---

আজের তুলির কাণে,  
তেপান্তরের সংবাদটি  
এনে দিয়েছিল, পরম  
স্নেহাস্পদ শ্রীমান্  
সন্তোষ বন্দ্যোপাধ্যায়।

কলিকাতা রেডিও অধ্যক্ষ  
মহাশয়ের অনুরোধে, এই  
উপন্যাসখানি, শারদোৎসবে,  
রেডিওতে বলা হয়েছিল।

অশেষ স্নেহভাজন শ্রীমান্  
সমর দে এ বইয়ের ছবি  
লিখবার ভার নিয়েছিল।

পরিচ্ছেদসমূহ

(মূল গ্রন্থে নেই)

## সূচীপত্র

[প্রথম পরিচ্ছেদ](#)

[দ্বিতীয় পরিচ্ছেদ](#)

[তৃতীয় পরিচ্ছেদ](#)

[চতুর্থ পরিচ্ছেদ](#)

[পঞ্চম পরিচ্ছেদ](#)

[ষষ্ঠ পরিচ্ছেদ](#)

[সপ্তম পরিচ্ছেদ](#)

[অষ্টম পরিচ্ছেদ](#)

[নবম পরিচ্ছেদ](#)

[দশম পরিচ্ছেদ](#)

[একাদশ পরিচ্ছেদ](#)

এই লেখাটি বর্তমানে [পাবলিক ডোমেইনের](#)  
আওতাভুক্ত কারণ এটির উৎসস্থল [ভারত](#) এবং  
[ভারতীয় কপিরাইট আইন, ১৯৫৭](#) অনুসারে এর  
কপিরাইট মেয়াদ উত্তীর্ণ হয়েছে। লেখকের মৃত্যুর ৬০  
বছর পর (স্বনামে ও জীবদ্দশায় প্রকাশিত) বা প্রথম  
প্রকাশের ৬০ বছর পর (বেনামে বা ছদ্মনামে এবং  
মরণোত্তর প্রকাশিত) পঞ্জিকাবর্ষের সূচনা থেকে তাঁর





সকল রচনার কপিরাইটের মেয়াদ উত্তীর্ণ হয়ে যায়।  
অর্থাৎ ২০১৮ সালে, ১ জানুয়ারি ১৯৫৮ সালের পূর্বে  
প্রকাশিত (বা পূর্বে মৃত লেখকের) সকল রচনা  
পাবলিক ডোমেইনের আওতাভুক্ত হবে।

# কিশোরদের মন

–মা দেখলেন, সুবিনয়।

কিশোরদের মন



কিশোরদের

মন

(এই স্থানধারক প্রতিস্থাপন করতে একটি চিত্র আপলোড করুন।)

# কিশোরদের মন

হাই ইস্কুল

ক্লাসের যেখানটাতে বসত সুবিনয়, বিমল বসত ঠিক তারি পেছনের বেঞ্চে।

থার্ড ক্লাস। এই ক্লাসে পড়াশুনার তেমন চাড্ নেই। ছেলেরা, এই ক্লাসে একটু জিরিয়ে নেয়।

ফাষ্ট ছেলে ছিল না বটে সুবিনয়, কিন্তু, মাষ্টার মহাশয়ের ডান দিকের ফাষ্ট সীটেই সে বসত।

জজের ছেলে সে। পড়াশুনায় ইংরেজিটা সে খুব ভালো জানত।

একদিন, ইংলিশের ঘণ্টা; ইংরেজি পড়া হতে হতে, একটা প্রশ্নের উত্তর সুবিনয় ঠিকমত দিতে পারলে না। হেডমাষ্টার মহাশয় তার পেছনের ছেলেটিকেই প্রশ্নটা আবার জিজ্ঞেস করলেন।

বিমল উঠে উত্তরটা দিলে।

উত্তরটা এত সুন্দর হ'ল যে, ক্লাসশুদ্ধ সব ছেলে বিমলের দিকে প্রশংসার দৃষ্টিতে চেয়ে রইল।

সুবিনয়ের মুখচোক ঘেমে উঠল। কিন্তু, ঘণ্টা শেষ হয়ে গেলে, সেই দিনই সে বিমলের সঙ্গে ভাব করলে।

টিফিনের সময়টা যে আজ কেটে গেল কোথা দিয়ে, কেউ যেন তা টের পেল না!

পরদিন সুবিনয়, বিমল, ঠিক পাশাপাশি বসত।

ক্লাসের সেরা ছেলেরা আর মাঝারি ছেলেরা, সকলেই বুঝতে পারলে, আর আর আওয়ারে যদিও ওরা fox কি cow (—যার মানে coward), কি আর কিছু, কিন্তু ইংরেজির ঘণ্টায় ওরা দুজনেই lion.

Fox ডাব্বার একটা কারণ ছিল। সেটা এই যে, বিমল ছিল ক্লাসের মধ্যে নামজাদা চঞ্চল ছেলে। যদিও অল্পদিন সে এসে ভর্তি হয়েছে।

আর তেমনি, সুবিনয় ছিল ক্লাসে বিখ্যাত দাতা ছেলে। ছুরিটে, পেন্সিলটে, বইটে, খেলার কি পিকনিকের চাঁদা, এ তার কাছে একবার চাইলেই হ'ত।

এই জন্যে ছেলেরা তার 'কামধেনু' বা ক্লাসের cow নাম দিয়েছিল।

আর বোর্ডে যেতে সে ভয় পেত বলে' তার coward নামটা যে তারা দিয়েছিল, তা যে একেবারেই খাটত না, তাও নয়।

বিমলের ছিল এক অদ্ভুত বেশ। সে একটা ছেঁড়া পাঞ্জাবি গায় দিয়েই প্রায় আসত। পাঞ্জাবিটার পিঠের মাঝখানে, India-র ম্যাপের মত খানিকটে জায়গা কি করে' উড়ে গিয়েছিল। এই জন্যে হরেন্ তাকে ডাকত—'দেশী জিওগ্রাফি'।

পাঞ্জাবিটে ছেঁড়া হলেও, খুব পরিষ্কার থাকত। বোধ হয় যে, রোজ সে সাবানে কাচ্তো।

কেন যে সেটাকে সে ছাড়ত না কি সারাত না, তা কেউ বুঝতে পারত না। জিজ্ঞেস করলে বলত—“বেশি ভাল জামা গায় দিতে গেলে বিলাসিতা হবে। আর, জামাটা ত এই শরীরের ঘর, ওতে একটা জান্না থাকা ভালো।”

আসলে, ঐ পাঞ্জাবিটে ওর মা'র হাতের তয়েরি। ওটা গায় না দিলে ওর ভালো লাগে না। আর ছেঁড়া জায়গাটা যদি সারাতেই হয়, ত বাড়ী গিয়ে

সে মা'র হাতেই সারাবে! দরজীর হাত ওতে দিতে দেবে,—সে, বিমল নয়।

---

# দ্বিতীয় পরিচ্ছেদ

সুবিনয়ে বিমলে বেশ ভাব এখন। একখানা বই আন্তে একদিন বিমল সুবিনয়ের বাসাতে গিয়েছে।

বসে আছে বৈঠকখানাতে।

এমন সময়, মুখখানা ভরা বড় বড় চোক আর জোড়া ডুরু, কুমোরদের-গড়া ছোট্ট প্রতিমার মুখের মত মুখ, একটি মেয়ে, ছবির বই একখানা হাতে করে' ঘরে ঢুকেই, বিমলকে দেখে বললে—“এটাকে দয়েল পাখী বলে? ইস্!—এটা শালিক!—

মটু সব জানে কি-না!”

বলেই, বইয়ের পাখীর ছবির পাতাটা খুলে' বিমলের হাঁটুর উপর রেখে নিজেও তার কোলের উপর ঝুঁকে পড়ল।

বিমলের মনে হল, সে যেন আধ মিনিটের মধ্যে কোন্ এক স্বর্গে চলে গেছে! সে নিজে ছিল বেজায় চঞ্চল, কিন্তু এমন সরল এত চঞ্চল মেয়ে সে আর কখনও দেখে নি।

সে খুকুর পিঠ থেকে কাণ্ হয়ে ঝুলে পড়া এক রাশ এলো চুলের নীচ দিয়ে বইখানাকে ধরে, তাকে ছবি দেখাতে লাগল।

বিমল শুনেছিল যে, সুবিনয়ের বাবা ম্যা চেঞ্জ থেকে দু' এক দিনেই ফিরবেন। বুঝতে পারলে যে তাঁরা ফিরেছেন। আর সুবিনয় যে তার ছোট্ট বোনটির কথা বলত, এ সেই।

ছবি দেখতে দেখতে, খুকু হঠাণ্ বিমলের দিকে মুখ ফিরিয়ে চেয়ে বললে “তুমি আমার কে হও?”

বিমল হাসতে লাগল। বললে—“আমি তোমার বিমল দা!”

খুকু বললে—“বিমল দা, তোমার ঘোড়া আছে?”

পা-দুটো এ—ই রকম করে’ চলবে?

আমি চড়ব।

মণ্টু আমায় চড়তে দেয় না।”

বিমলের স্বপ্নটা যেন ভেঙে গেল। সাধারণ গৃহস্থ মা-বাপের ছেলে সে, ট্রাইসিকেলের ঘোড়া সে দেখেছে, কিন্তু ওর, কিছুই সে জানে না।

তবু সে হেসে বললে,—“আচ্ছা, মণ্টুকে আমি বলে দেবো।”

খুকু মুখ ভার করে বললে-“আমি মণ্টুকে নে’ খেলব না।”

বিমল বললে—“আচ্ছা খুকু, মণ্টুর নাম ত মণ্টু, তোমার নাম কি?”

খুকু টলটলে’ দুটাে উজ্জ্বল চোক বিমলের দিকে ফিরিয়ে, তুলে’ বললে-“আমি বেণু!”

সেই সময় ভেতর থেকে ডাক এল—“খুকু! লম্বি! আ—মি নাইয়ে দেব, নাইবে এস!”

খুকু চাঁচিয়ে বললে—“না মা, আমি নাইব না—আমি ছবি দেখব —।”

ব’লে খুকু বিমলের কোলের উপর আরো ঝুঁকে পড়ে, পা দুটাে দোলাতে লাগল।

রাত্রে ট্রেণে আসা হয়েছে, সকাল সকাল ভালো করে’ নাইতে হবে;

কিন্তু অত সকালে আর নন্যার মার হাতে খুকুর নাইবার ইচ্ছে নেই, তাই ছবির বই নিয়ে, পালিয়েছিল!

বিমল খুকুর পিঠে চুলের উপরে আদরে হাত বুলোতে বুলোতে বললে,  
—“খুকু! সত্যি এখনো তুমি নাও নি? মার কথা শুনতে হয়! যাও যা-ও নাও  
গে!”

“তুমি চলে যাবে না?”

বিমল হাসতে লাগল।

খুকু দাঁড়িয়েই, দেখল বিমলদার পিঠের জামাটা ছেঁড়া।

বেণু আরো সোজা হয়ে দাঁড়িয়ে—“তুমি বুঝি মণ্টুকে ভালো বাস?

—দুষ্টু!”—

বলে’ দুই চোক আরো খুব প্রকাণ্ড করে’—রাগ করে’ দাঁড়িয়ে রইল।

বিমল কিছুই বুঝতে পারলে না, সে আশ্চর্য্যে, আনন্দে, জিজ্ঞেস করলে  
—“কি করে জানলে খুকু?”

“হুঁ, মণ্টু খালি জামা ছেঁড়ে। তুমিও ছিঁড়েচো, নৈলে, তুমি জামা  
ছিঁড়লে কেন?”

বিমল এবার আর থাকতে পারলে না, ‘হো হো’ করে’ হেসে উঠল।

তার হাসিতে বেণু আরো বেগে গেল।

সে বড় বড় চোক একটু কুঁচিয়ে, দুই ঠোঁট চেপে বিমলের জামার ছেঁড়া  
জায়গায় আঙুল ঢুকিয়ে, পড় পড় করে’ আরো খানিকটে ছিঁড়ে দিলে।



“বেণু!”

বিমল চেয়ে দেখলে, দুর্গামূর্তির মত মা দাঁড়িয়ে রয়েছেন, দরজা পেরিয়ে এসে; চোকে তাঁর ধমক মাথা, কিন্তু তবু তাঁর সমস্ত চেহারা দিয়ে যেন অমৃতের ঝরণা ঝরে’ পড়ছে।

“মা, মা! ও আমার বিমল দা!”

বলে’ বেণু, মার দিকে একটু এগিয়ে এসেই, বলে, তক্ষুণি আবার বিমলের ডান হাতের তিনটে আঙুল ধরে’ দাঁড়িয়ে রইল।

বিমল আগেই উঠে পড়েছিল। কাপেটের উপর পা এগিয়ে, সে-ও দাঁড়িয়ে গিয়েছিল। দোরের খোলা হাওয়াতে তার ছেঁড়া জামা তখন ইষ্টিমারের কোণ বাঁধা পর্দার মত উড়ছিল। সে তারি লজ্জা ঢাকবে, কি সব কথা মনে করে হাসবে, কি মাকে প্রণাম করবে, কিছুই ঠিক করতে পারছিল না।

মা এসেছিলেন খুকুর আন্দারে’ চীকারটি শুনে’ তাকে ধরে নিতে। ভাবছিলেন সে বুঝি সুবিনয়ের পড়ার ঘরে তার কাছে ছবি দেখছে। বৈঠকখানার ধারে আসতেই খুকুর কাণ্ডটি দেখতে পেলেন।

সুবিনয় ত নয়, তারি মত একটি ছেলে। তা—র জামাটা ছিঁড়ে দিচ্ছে!

একটু এগিয়ে, মা বললেন—“খোকা, তোমার নাম বিমল? কোথায় থাকো তুমি বাবা?”

মার কথাতে বিমল যেন কুল পেয়ে, আস্তে এগিয়ে এসে, মাকে প্রণাম করে,’ বলতে যাচ্ছিল।

—এমন সময় মা দেখলেন, সুবিনয়।

সুবিনয় ঘরে ঢুকতেই,...“কেমন! দ্যাখো দাদা! দিয়েছি ত ছিঁড়ে জামা?  
কেমন!”

বলে' খুকু, ভারি খুসী হয়ে উঠল।

---

# তৃতীয় পরিচ্ছেদ

সুবিনয় আর বিমলের মধ্যে এখন, মা অনেক সময় ভুলে যান, কে তাঁর ছেলে।

আর মণ্টু আর তার দিদির মধ্যে ভাব যা হয়েছে এখন তা কখনো স্বপ্নেও হয় না।

বিমল মুণ্ডুর ভাঁজত। তার শরীরটে ছিল যেন লোহার কাঠামোতে তৈরি। দুই ভাইবোনকে কাঁধে নিয়ে বিমল যখন তিনতলার সিঁড়ি ভেঙে ছাদে উঠত, তখন তাদের সেই ঝগড়ার ঘোড়াটার কথা একটুও মনে থাকত না!

আর মাঝে মাঝে বিমলের হাতের যেন এই ছোট্ট দুটি জীবন্ত মুণ্ডরের আনন্দের চীৎকারে সিঁড়িঘরের হাওয়ার স্তম্ভটা চূর্ণ হয়ে যেত!

ছাদে উঠে সুবিনয় বলত,—“তু-ই জিতেছিস্ বিমল! দাদা হওয়া আমার কাজ নয়। আমি ছিলাম ওদের শুধু ছবির বইয়ের দাদা। ওরা আমাকে এখন একেবারে ভুলেছে।

ছবি, খেলা, পড়া, খাওয়া, নাওয়া, গান; তুই কি করে এত জানিস্?... —তুই একটা Hexagon.”

বিমল বলত,—“দাঁড়া! এখনো বাকী আছে।—

বেণু, মণ্টু, দাঁড়াও ত, এখন তোমাদের প্যারেড্ হবে।

তা’ পরে পূজোর আরতির পর মা চা পাঠিয়ে দেবেন,—বল্ এখন, Octagon বল্বি কি না?”

মণ্টু চাঁচিয়ে বল্লে—“গন্!—গন্—মানে বন্দুক!”

বেণু তাকে থামিয়ে বল্লে,—“ভারি জানিস্ কি না?—

Go মানে যাওয়া,

Gone মানে—গিয়েছিল!

—না বিমল দা?”

---

# চতুর্থ পরিচ্ছেদ

গরমের ছুটিতে বিমল বাড়ী গিয়েছে। কথা ছিল সুবিনয়ও যাবে।

কিন্তু বিমলদের বাড়ী যেখানে সেখানকার স্বাস্থ্য এ ক'মাস ধরে' তেমন ভালো থাকত না। সুবিনয়ও ওরকম পাড়াগাঁয়ে আর কখনো যায় নি।

বিমল বললে,—“বেশ্ হবে! মা ত গঙ্গান্নানের যোগেই আসছেন,— ক'দিন ত এ সহরেই থাকবেন, তখন সবাবি সঙ্গে দেখা হবে। তুই শীতের সময় যাবি সুবিনয়!”

সুবিনয়ও দেখলে যে, বেশ হবে!

দু'জনের কথার যেন শেষ হল না!

কি করে' যে বিমলকে যেতে হল একেবারে একা একা মন নিয়ে, চোকের জল পড়তে না দিয়ে উননের কড়াইয়ের জলের মতন—জ্বাল দিয়ে বাস্পের ধোঁয়া করে' করে', তা সে-ই জানে।

সহরে ট্রেনের টাইম সে পেলে না। মণ্টু আর বেণু ঘুমোলে, রাতিরে লুকিয়ে মাকে প্রণাম করে, আর, সুবিনয়ের হাত থেকে হাতখানা ছাড়িয়ে, দু' মাইল দূরে একটা জংসন ষ্টেশান থেকে তাকে ট্রেনে উঠতে হল।

ট্রেনে বসে বসে, বিমল চলছিল যেখান দিয়ে সে দেশে বোধ হয় রাতি আর দিন নেই। কেন না, ঘুম ত আসছিলই না, তার মনটা পেছন দিকে দেখছিল কেবল সুবিনয়কে, মাকে, আর মণ্টুকে আর বেণুকে!

আর সাম্নে দেখছিল ছোট্ট নদী ঘেরা সবুজ গ্রামখানির ভিতরে, উঠোনের ঝলক দেওয়া বৌদ্রের সমুদ্রের শ্বেত পদ্মফুলের মত তার মাকে।

জান্না দিয়ে দেখা যাচ্ছিল, আকাশের তারাগুলো যেন সেই দুইরাজ্যের সারা পথ ভরে' ফুল ছড়িয়ে রেখে তারি সঙ্গে বসে জাগছে। আর লম্বা ট্রেন-খানারও যেন এক মাথা সে—ই সহরে, আর এক মাথা তাদের গ্রামে। কেবল ভোর হচ্ছে না। দেখে মোষের মত ফোঁস্ ফোঁস্ করে' মাঠ মাটি সব রাগে গুঁতিয়ে শুধু গর্জ্জাচ্ছে।

ফর্সা হতেই সে তাদের ষ্টেশানে পৌঁছল। বাড়ী থেকে যেতে যেমন, গাড়ী থেকে নামতে যেন, তেমনি কষ্ট হচ্ছিল। তবু সে নেমে পড়ল লাফিয়েই। রবারের বলগুলোর যেমন উপরের দিকে টান বেশি কি মাটির দিকে টান বেশি ঠিক নেই, ঠিক তেমনি।

নেমেই সে টিকেটকালেক্টরের হাতে টিকেটটা ফেলে দিয়ে হন্ হন্ করে' ছুটল আম কাঁটাল বট কদম পাকুড়ের ছায়াঢাকা পথ ধরে,' যেন দু'সারি সৈন্যের ভিতর দিয়ে সেনাপতি রাজবাড়ীতে চলেছে। খোলা মাঠ বয়ে' যেন তার বাড়ীর হাওয়া এসে গায়ে লাগছে।

বেলা সাতটায় বিমল বাড়ী পৌঁছল। দেখল উঠোনেই মা। মাকে দেখেই, সে প্রথমে, হেসে দিলে।

“মা! তুই দুঃখ কতিস্ আমি তোরা একা, ভাই বোন একটাও আমার নেই।

কিন্তু মা, এইবারে দেখতে পাবি!

ইচ্ছ কচ্ছিল আমার, তোকে এখনি দেখাতে,—ছোট দুটিকে পুরে' নিয়ে আসি আমার দুটো পকেটে করে'!”

মাও হাসিমুখ হয়ে চেয়ে রয়েছেন শুধু, কিছু না বুঝতে পেরে।

তাঁর হাসিটুকু নিয়ে বোদ যেন কাড়াকাড়ি করছিল।

বিমল বল্লে,—“কিন্তু মা আনিনি কেন জানিস্?”

তোৰ হাতের জামা ওৱা ছিঁড়ে দিয়েছে।

তাৰ শাস্তি দিতে হবে।

তোকে ওৱা দেখতে পাবে, সেই যখন তুই গঙ্গান্নানে যাবি; তাৰ আগে  
নয়!

কিন্তু মা তোকে নমস্কার করতে ভুলে গেছি!”

তখন, দুজনে হাসতে লাগলেন। মা ত তখনো খুব অবাক হয়েই।

বিমল বল্লে, “বল্ৰ, বল্ৰ মা, শুনিস্, বল্ৰ!”

খেতে বসে বিমল মার কাছে সব বল্লে।

শুনে মার কাছে যেন একখানি ছবি ফুটে উঠল। মা মনে মনে সে  
তিনটিকে কতই যে আশীৰ্বাদ করলেন! বিমলের নূতন মার কথা শুনে তাঁর  
মুখখানা রাঙা হয়ে কী সুন্দর হয়েই উঠল।

বিমল বল্লে,—“কিন্তু মা, তোৰ কাছে বসে’ আৰ সব কথাই ভুলে  
যাই।

সব ভাতগুলো শুধু ডাল দিয়েই খেয়ে ফেলেছি মা!”

# পঞ্চম পরিচ্ছেদ

আর আর বারে ছুটি ত কোথা দিয়ে পালিয়ে যায়, এবারে যেন ফুরুচ্ছেই না। আর মার গঙ্গান্নানের যোগটাও আসছে না।

যা হ'ক গ্রামে বারোয়ারি কালীপূজা নিয়ে বিমল মেতে রয়েছে কদিন খুব। শৈলেন, নরেন, চারু, ক্ষিতীশ পাড়ার সব ছেলেদের সঙ্গে সারাদিন উঁসাহে বেজায় সে খেটেছে।

মোড়ল সে-ই।

তা'পর সন্ধ্যায় আরতি দেখতে গিয়েছে সকলে।

অনেক ছেলেমেয়েরা এসেছে। আরতির ধোঁয়ার ভিতর দিয়ে ওধারের ছেলেদের মুখ আব্ছা আব্ছা দেখাচ্ছে। কিন্তু যারা রংমশাল জ্বালিয়েছে তাদের আর তাদের কাছের ছেলে মেয়েদের মুখ এমন সুন্দরটি হয়ে উঠেছে, যে, দেখে বিমলের শুধু মনে হচ্ছিল যে ওরা সব ক'টি বেণু আর মণ্টু।

আর বিমলদের সারিতেই যারা এসে দাঁড়িয়েছে একটু ফিটফাট পোষাকে, আলো আর ধোঁয়ার ভিতর দিয়ে বিমলের তাদের মনে হচ্ছিল যে, যেন সুবিনয়ই এসে দাঁড়িয়েছে—তাদের পাশে পূজার মণ্ডপে!

কাঁসর আর শাঁখের সুরের সঙ্গে তার মনের সুরও যেন ফেটে যাচ্ছিল, আনন্দে চাঁচিয়ে মনের ভিতরে!

কিন্তু সে চুপ করে' করে' চেয়ে থাকছিল রঙে-ঘামানো সুন্দর প্রতিমার দিকে।

একদিন শৈলেনরা এরপরে মাছ ধরতে গিয়েছে। তার সেই প্রকাণ্ড ছিপটা সঙ্গে; বিমলও। কতক্ষণ পরে পকেট থেকে একখানা খাম—আর



তার ভিতর থেকে কাগজ, দ্রৌপদীর বস্ত্রের মতই, একটার পর একটা,—বের করে' বিমল বল্লে, “এই দ্যাখ্ চিঠি।”—

তারা দেখ্লে,—কি সুন্দর সুবিনয়ের হাতের লেখাটি!

আর বিমল বল্লে,—“আর যে দেখ্ছিহ্ হাঁসের ডিমের মত গোল গোল অক্ষরগুলো, এইগুলো বেণুর। আর এই যে বকের পা আকার মত জোরালো জোরালো অক্ষর, এই গুলো মণ্টুর।”

তারপর ছুটি ফুরোলো।

ছুটি ফুরোলে, ফেব্বার সময় মা দুটাে জামা তয়ের করে দিয়েছেন বিমলকে।

তবু সেই আগেকার জামাটা সে কিছুতেই ফেল্বে না।

বল্লে, “দ্যাখ্ মা, ওখানটায় পেছনের দিকে আর একটা পকেট রাখ্লে কেমন হয়?

সেই পকেটে, ওরা সব খেলার জিনিষ ফেলে দেবে, আর,—কী খুসীই হবে!

আমি তখন ওদের তোমার কথা বল্বে মা!”

শনে' মা ত হেসেই সারা।

# ষষ্ঠ পরিচ্ছেদ

বিমল ফিরেছে।

কিন্তু ইস্কুল খোলার মাসখানেকের পর, ক্লাসে ভারি একটা ওলোট পালোট দেখা যাচ্ছে।

First বেধের শেষ সিটে—সুবিনয়।

আর কাম্বাম্ বৃষ্টিতে ডিজে এসে, বিমল, লাষ্ট বেধের শেষে বসে আছে।

কতক্ষণ পরে সে ছুটি নিয়ে চলে গেল।

ইস্কুলের ডিবেটিং ক্লাবের মিটিংএর শেষে, বজৃতার ইংরেজীর একটা গ্রামারের কোশ্চন নিয়ে, ঘোর তর্কাতর্কি হয়। তাতে ইস্কুলে দুটাে দল হয়ে যায়। কিন্তু সে তর্কের মীমাংসা হল না।

সুবিনয় আর বিমল, সেই দিন দু'জনে দুই দলে পড়ে' যায়।

তার থেকে, একদিন বেড়াতে বেড়াতে কথায় কথায় ঐ বিষয়টি নিয়েই দু'জনে আরও একটুকু তর্ক বেধে গেল।

তারা নদীর ধারে বেড়াচ্ছিল। নদীর যেমন অসংখ্য চেউ আর চেউগুলো যেমন উঁচু নীচু, তাদের তর্কও তেমনি ক্রমে অফুরন্ত হয়ে একটু একটু ক'রে নরম-গরম হয়ে উঠল।

বিমল বল্লে,—“মেনে নিতে পারি তোার কথাটাই, যদি একটা উপযুক্ত প্রমাণ পাই।”

সুবিনয়ও বললে,—“মান্তে পারি তোর কথাই, যদি তার কোনো খাঁটি প্রমাণ থাকে।”

প্রমাণ ত মিটিংএই অনেক উঠেছিল, কিন্তু মীমাংসাতে তার কোনোটাই টেকে নি। এখন প্রমাণ দুজনেই যা দিলে, তাতে তর্ক আরও ক্রমে বেড়েই চলল।

আর হতে হতে এই তর্কের ফল এমন হল যে, শেষে দুজনের কথাবার্তা বন্ধ হয়ে গেল।

নদীর ধার দিয়ে দুজনে এক সঙ্গেই এল। একই ঝিরঝিরে বাতাসে। কিন্তু তা’পর দুজনে দুদিকে চলে গেল।

বিমল থাকত তার পিসীমার বাড়ীতে, সহরের আর একটা পাড়াতে।

বিমল যদি কোনোদিন সুবিনয়দের বাড়ীতে না যেত, ত পরদিন ভোরেই সুবিনয় তার ওখানে আসত।

এমন একটি দিনও যায় নি, দুজনে যেদিন দেখা না হয়েছে।

কিন্তু আজ দুমাস হল, কেউ কারো বাড়ীতে যায় না।

মা জিজ্ঞেস করতে এলে সুবিনয় পড়ার বই নিয়ে খুব শক্ত হয়ে পড়তে বসে।

মা বলেন,—“তোদের হাফ ইয়ার্লি পরীক্ষে বুঝি খুব কাছে খোকা?”

“হ্যাঁ মা, বেশি দেরী নেই।” বলে’ তাড়াতাড়ি সুবিনয় জোরে জোরে পড়তে আরম্ভ করে।

আর যখন মণ্টু আর বেণু আসে, তখন আলমারি থেকে সবগুলো

ছবির বই তাদের বের করে দিয়ে, আর তাদের ঘোড়া, পুতুল, বাক্স, সমস্ত ঘরের মধ্যে নিয়ে এসে, বলে,—“আয় তোরা এইখানে খ্যাল্।”

বেণু বলে—“বিমলদা আসুক আগে!”

মণ্টু—লাঠিটে হাতে, আর জুতো পর্তে পর্তে বলে,

—“আসুক আগে”

শেষে, বিমলদা না আসাতে তাদের যা খেলা হয়, তাতে ঘরখানির অবস্থা দেখে কান্না পায়।

নয় ত, তাদের দু জনকে দু’ পাশের সোফার উপরে ঘুমিয়ে থাক্তে দেখে, খেলার জিনিষগুলোরো কান্না পায়।

বাইরে রাত আরো অন্ধকার হয়ে যায়।

সুবিনয় ওদেরে বুকে করে তুলে নিয়ে মার কাছে দিয়ে আসে। আর নয় মানুষাকে বলে— “ওদের খাটে ওদের শুইয়ে দিয়ে হাওয়া করে’ ঘুম পাড়া মানুষা!”

সুবিনয় আজ কাল রাতের এগারোটারও পর পর্যন্ত পড়্তে থাকে।

এদিকে বিমল, গঙ্গান্নানে মা আসবে কি না, এই বিষয় নিয়ে কত রকমের আলোচনা করে’ ক’খানা চিঠি লিখে রেখেছে, কিন্তু তার একখানাও তার ডাকে দেওয়া হয় নি।

বিমল পড়ে, ইস্কুলে যায়, কিন্তু বিকেল পাঁচটার পর থেকেই তার মনে হয়, পৃথিবীটে যেন মুছে ফেল্তে রাত্রি এখনি এসেছে।

মুগুর ভাঁজা সে ছেড়ে দিয়েছে। সে খেলতে যায়, কিন্তু একটা কলের খেলোয়াড় বানিয়েও যদি fieldএ নামিয়ে দেওয়া যেত, বোধ হয় অমন করে, সেটাও অতবার ডুল করত না।

বাসায় আসার পথে, পাল্কা-বেয়ারাদের কুঁড়েগুলোর সামনে আগুনের ধূনির চারদিক ঘিরে ধুলো উড়িয়ে যে ছেলেগুলো নাচ্ছে, সে হয়ত হঠাৎ তার দু একটাকে ধরে' কাঁধে উঠিয়ে নেয়।—বেয়ারারা হুঁকো কল্কে তাড়াতাড়ি নামিয়ে মোড়া এগিয়ে দিয়ে বলে—

“বাবুজী, পের্ণাম; বৈঠিয়ে, বৈঠিয়ে!”

কিন্তু বিমলের ডুল ভাঙতেই বিমল আস্তে তাদের নামিয়ে দিয়ে, পর্ণামের উত্তর রেখে, তাড়াতাড়ি চুপ করে' চলে যায়।

# সপ্তম পরিচ্ছেদ

ঘড়ির কাঁটা তবুও সব বাড়ীতেই প্রায় ঠিক ঠিক মতই চলছে। কিন্তু সুবিনয় মাঝে মাঝে তার টাইমপীস্টাতে চাবি দিতে তবুও ডুল করে ফেলে।

বিমলের ত ঘড়ি নেই। তার কোনই বালাই নেই।

কেবল, হয়ত, বেলাই অনেক তার বেড়ে যায়।

একদিন ক্রিকেট ম্যাচে, বিমলের একটা hit হঠাৎ সুন্দর হয়ে যাওয়াতে, সুবিনয় “Gr-a-nd” বলতে গিয়েও,—নিজের মুখ রুমাল দিয়ে চেপে ধরে’—চলে এল।

আর বিমল একদিন নদীর ঘাটে স্নান করতে গিয়ে, এক ঘণ্টা ধরে’ ভিজে কাপড়ে কোর্টের কাছে একটা বটগাছের নীচে দাঁড়িয়েছিল,— সুবিনয়ের বাবার গাড়ীখানা আসে কিনা দেখতে। সেই গাড়ীতে অনেক সময় মণ্টুরা বাবার সঙ্গে কোর্টে এসে আবার চাপরাসীর সঙ্গে ফিরে যায়।

কিন্তু সেদিন গাড়ী মোটেই এল না।

এর পরে মায়ের অসুখের চিঠি পেয়ে, বিমল বাড়ী চলে গিয়েছে।

# অষ্টম পরিচ্ছেদ

সন্ধ্যে রাঙা হয়ে উঠেছে।

দূর থেকেই বাড়ীর গেট, দাঁড়িয়ে আছে।

ফুটবলের ফিল্ডে গোলপোস্টটার কাছে কোন কোনদিন দেখা যেত, সুবিনয় সেখানে পায়চারি করছে, যখন খেলা শেষ হয়ে গেছে।

সেই পায়চারির পা দুটোই তাকে ধীরে ধীরে বাঁধের উপরে বড় রাস্তাতে নিয়ে যেত, গির্জার বকুলতলায়, বাঁধ যেখানে শেষ হয়েছে। বাঁধানো চত্বরে সে উঠত। কিন্তু সদ্য ঝরে' পড়া বকুলের সৌরভ দিয়ে সেখানে কি কথা যে লেখা ছিল, তা সে পড়ে' উঠতে পারত না।

মৌমাছির গুন্ গুন্ করে' বোধ হয় একজনের আনন্দের চঞ্চলতার কথা মনে করিয়ে দিত।

কিন্তু থাক্।

মার কাছে সে গিয়ে যখন খেতে বসত, আলোতে বই খুলে' পড়া শুরু করতেই যখন বিমলের হাতের নোটস্গুলো চোকে পড়ত, তখন আলোর সাম্নেও তার সেদিনের তারিখটি যেন অনেক দূরে কোথায় অনেক পিছিয়ে যেত।

হয়ত শুধু মণ্টু আর রেণুর গলা জড়িয়ে ধরা—ডাকটি এসে আবার সেদিনের তারিখে তাকে অজ্ঞাতে আনত ফিরিয়ে!

সে তাদের বুকে টেনে নিয়ে এসে মিথ্যেই খেলা দিতে বসত। কেন না, সে খেলাটাই হয় ত সে সবটা জানে না! তবু সে ডুল করেও খেলত।

না হয় এমন একটা গল্প যুড়ে দিত যে, যাব আর কখনও শেষ না হয়।

আর তাও না হলে, নিজের একটা কঠিন মুখস্থের পড়া নিয়ে বসে  
যেত।



# নবম পরিচ্ছেদ

হাফ ইয়ার্লির কয়েকদিন আগে, সুবিনয় দেখলে, বিমল এসেছে।

তার কাণে এ কথাটি এল। ক্রমে জানতে পারলে সে, মার চিকিৎসা করাবার জন্যে, মাকে সঙ্গেই নিয়ে এসেছিল বিমল।

একটি নিঃশ্বাস, আধখানা হতে হতে, আশ্তে ভেঙে গেল।

খুব তাড়াতাড়ি করে' ছেলেদের সঙ্গে যেন যুদ্ধ করে, পূজোর আগেই হাফ ইয়ার্লি শেষ হল।

ছুটির ক'দিনই বা আর? সে কটা দিন যেন ঠিক ছেঁড়াকাগজের নিশানের মত খসে' খসে' পড়তে লাগল। রং ফ্যাকাসে হয়ে।

মা পূজোতে এইখানেই থাকবেন।

হাফ ইয়ার্লির result বেরোবার দিন, সুবিনয়, বিমল, গিয়েছে ইস্কুলে। দু'জনেই জানলে, দু'জনেই ইংরেজিতে এক ব্রাকেটে ফার্ষ্ট হয়েছে।

দু'জনেরি চোক একবার একত্র হয়ে, নীচু হয়ে গেল।

তারপর দুজনারি মুখ, কা—লো,—গম্ভীর হয়ে গেল।

পথে ফিরবার সময়, সুবিনয় একসময়ে লক্ষ্য করে দেখলে যে, বিমলের মুখখানা যেন কতদিনের শুকনো।

বিমলও এক ফাঁকে লক্ষ্য করে দেখলে যে, সুবিনয়ের মুখখানা যেন বিষম কালি ঢালা।

দু'দিকের গাছের নীচের ছায়ার রাজ্যও, ঘন হয়ে আস্ছিল।

# দশম পরিচ্ছেদ

কখন পূজোর ছুটি হয়ে গেছে।

তার পরের দিনগুলো ‘ছুটি’ গায়ে মেখে বেড়ালেও, তাদের, ছুটি যেন একটুও নেই। নানা রকমের ভিড়। নানা কাজের ভিড়।

পূজোর ধূমে সহর মাতিয়ে দিয়ে, অবশেষে পূজোর বাদ্য থেমে গেছে।

আজ বিজয়া।

সহরের সদর পথে অনেক দূর ধরে’ নিরঞ্জনার প্রতিমার সঙ্গে বাজনার করুণ এলোমেলো সুর আর সহরের পাকা পথে আর চারধারের গ্রামের কাঁচা পথে হয় ত ঠিক তেমনি এলোমেলো যত লোক জনের সারি। বিকেল থেকেই, থেমে থেমে, নদীর দিকে ছুটেছে। বাজনার ঢোল যেন ঠিক সেই রূপকথার ঢোলের মতই বাজছে, তার একদিকে ঘা দিলে হাট বসে আর এক দিকে ঘা দিলে হাট ভেঙে যায়। বাজনার একদিকে সারাটি সহর যুড়ে’ উসবের সুর, আর তার আর একদিকের সুর বিসর্জনের মলিন বিষাদে আঁকা!

দূরে নদীর বুকের উপরের আতস বাজির গলে’ পড়া আলা একটু একটু দেখা গেল। কত হাজার হাজার চোক কত দিক থেকে যে ওকেই দেখছে।

রাত্রি আটটার পর থেকেই কোলাকুলি শুরু হয়ে গেছে।

মাকে, পিসীমাকে প্রণাম করে,’ বড় রাস্তায় এসে উঠে, বিমল একবার মনে করলে,

“যাই”।

আবার খানার রাস্তা পর্যন্ত এসে, আবার ফিরে গেল।

গিয়ে মার কাছে বসে' রইল।

মার মনে বিমলের নূতন ভাই বোন্দের যে মধুর ছবিখানি লেখা হয়েছিল, রোগের দারুণ যন্ত্রণাতেও তা মোছেনি একটুকুও। সহরে এসেই মা বলেছিলেন,

“তাদের নিয়ে আস্‌বি, বিমল!”

বিমল বললে,—“আন্ব ত মা, আন্ব; একটু আগে, তুই, ভাল হয়ে নে না মা!”

কিন্তু বলেই, বিমল, আর মার মুখের দিকে চেয়ে থাকতে পারত না, চোখ দুটাকে নিয়ে, অন্য একদিকে চেয়ে থাকত।

বোধ হত, সেখানেই কি দেখছে খুব!

প্রায় ক'দিন পর পরই মা বলতেন,—“আমি ত অনেক ভালো হচ্ছি বিমল, ওদের কবে আনছি?”

বিমল খতমত খেত। আর বলত—“দাঁড়া মা, আগে তোর নতুন অম্বুদটা খাওয়ার দিন ক'টা যাক।”

বলে' বিমল দোরের ফাঁক দিয়ে দূরে যে তাল গাছটা দেখা যাচ্ছিল সেইটের দিকেই থাকত চেয়ে। কিন্তু হয় ত সে, তালগাছ-টাই দেখছে না।

দেখছে না সে কিছুই হয় ত, অনেকক্ষণ।

এদিকে অম্বুদ খাওয়ার সেই দিন ক'টা যেতে যেতে পূজো শেষ হয়ে গেল। বিজয়া শেষ হতে যাচ্ছে। আগের চাইতে মা অনেক ভাল হয়েছেন।

অম্বুদও বদলে গেছে আজ দু'দিন

# একাদশ পরিচ্ছেদ

আস্ছে যাচ্ছে লোকের পর লোক সুবিনয়দের বাসায়। মা ধানদূর্বার আশীর্বাদ দিচ্ছেন।

মা বল্লেন-“বিমল আজো, এখনো এল না রে?”

বোধ হয় আরো রাতিরে আস্বে?”

মটুরা যখন সুবিনয়কে প্রণাম করেই বুকে ঝাঁপিয়ে পড়ল, সুবিনয় তখন শুধু তাদের হাতের ছোঁয়াটাই পেল, তাদের মুখ সে কি দেখতে পেল?

না! না!

মাকে, বাবাকে, সে প্রণাম করেছে।

গাছপালার ফুলে হাসা প্রণাম নিয়ে, শরতের জ্যোৎস্না মাথা মেঘেরা চলে গেল। সে তা-ও দেখতে পেল না।

ফাণের টবটার কাছে সে শুধু দাঁড়িয়ে রইল।

তিনটে চাদর, ঝুলছিল আলনাতে। একটা চাদর গলায় জড়িয়ে নিয়ে সে বারান্দায় ঘুরতে লাগল।

কতক্ষণ পরে সে চাদরটা গলা থেকে খুলে' একটা চেয়ারের ব্যাকে রেখে, তাতেই বসে পড়ল।

বসে' বসে' কতকটা ঘুমের মত আস্ছিল, কেউ দেখে বোধ হয় এই রকম মনে করত।

হঠাৎ সে উঠে, খালি সাটটা গায়ে, মাঠের উপর দিয়ে চল্ল।

রাস্তার আলোর তল দিয়ে লোকজনেরা চলছে, শব্দ করে গাড়ী চলছে  
কাঁকর-পথের মাঝখান দিয়ে, ঘাসগুলোর উপর দিয়ে চোক বুলিয়ে, সে,  
গাছের আড়াল ধরে আস্তে চলল। ষ্টেসানের পুকুরের ওপারের পথ বেয়ে  
থানা পেরিয়ে গিয়ে, সে বিমলদের বাসায় উঠেছে। ভিতরে ঢুকে, সিঁড়িতে  
উঠেই সে থেমে গেল।

পিছন ফিরে দাঁড়িয়ে, কামড়াতে লাগল হাতের বুড়ো আঙুলের নখটা।

কোথাও সাড়া শব্দ নেই।

ভাবছিল ফিরে যাবে।

বিমলদের ঘরে, মা ঘুমিয়ে পড়েছেন।

বিমল মাথায় একটা পাগড়ি জড়ালে।

তারপর সেটাকে খুলে রেখে কতক্ষণ মায়ের পায়ের কাছে বসে রইল।

তারপর আবার উঠে বেরিয়ে এল।

আসতেই, দোর খুলেই,—সামনে—সুবিনয়!

শব্দ শুনে' সুবিনয় ফিরেই,—দেখলে—বিমল!

একেবারে বিস্ময়ে, দুজনে কতক্ষণ দুজনের দিকে চেয়ে থাকলে।

তারপর হেসে দিলে বিমল, সুবিনয়, দুজনেই

আর ক' সেকেণ্ডের মধ্যে দুজন দুজনের বুক—বিজয়ার আলিঙ্গনে  
বাঁধা পড়ল।

হঠাৎ সুবিনয়ের হাত বিমলের পিঠের একটা পকেটে গেল বেধে!

চম্কে সুবিনয় বল্লে,—

“কি রে?”

বিমল বল্লে—

“সেই জামাটা, মাকে দিয়ে নিয়েছি সারিয়ে, পিছনে একটা পকেট করে’।

আজ ইস্তিরি করে পরেছি

তোদের ওখানে যাব বলে!”



“কি রে?”



# এই ডিজিটাল সংস্করণ সম্পর্কে

এই ই-বই অনলাইন গ্রন্থাগার [উইকিসংকলন](https://bn.wikisource.org)<sup>[১]</sup> হতে প্রাপ্ত। স্বেচ্ছাসেবীদের দ্বারা নির্মিত এই বহুভাষী ডিজিটাল গ্রন্থাগার উপন্যাস, কবিতা, পত্র-পত্রিকা ইত্যাদি সমস্ত ধরনের প্রকাশনার মুক্ত সংকলন গড়ে তোলার জন্য অঙ্গীকারবদ্ধ।

আমরা কপিরাইটমুক্ত অথবা মুক্ত লাইসেন্সের অধীনে প্রকাশিত বইগুলিকে বিনামূল্যে প্রদান করে থাকি। আপনি আমাদের ই-বইগুলিকে [ক্রিয়েটিভ কমন্স অ্যাট্রিবিউশন-শেয়ারঅ্যালাইক ৩.০ আনপোর্টেড](https://creativecommons.org/licenses/by-sa/3.0/deed.bn) লাইসেন্স<sup>[২]</sup> বা [জিএনইউ ফ্রি ডকুমেন্টেশন লাইসেন্সের](http://www.gnu.org/copyleft/fdl.html)<sup>[৩]</sup> শর্তাধীনে বাণিজ্যিক উদ্দেশ্য সহ যে কোন উদ্দেশ্যে ব্যবহার করতে পারেন।

উইকিসংকলন সর্বদা নতুন সদস্যদের জন্য উন্মুক্ত। এই ই-বইয়ে কিছু ভুল ভ্রান্তি থেকে যাওয়া সম্ভব, সেক্ষেত্রে আপনি [এই পাতায়](#) জানাতে পারেন<sup>[৪]</sup>।

নিম্নে তালিকাভুক্ত ব্যবহারকারীরা এই ই-বইয়ে অবদান রেখেছেন:

- Bodhisattwa
- Mahir256

- 
1. [↑ https://bn.wikisource.org](https://bn.wikisource.org)
  2. [↑ https://creativecommons.org/licenses/by-sa/3.0/deed.bn](https://creativecommons.org/licenses/by-sa/3.0/deed.bn)
  3. [↑ http://www.gnu.org/copyleft/fdl.html](http://www.gnu.org/copyleft/fdl.html)
  4. [↑ https://bn.wikisource.org/wiki/উইকিসংকলন:লিপিশালা](https://bn.wikisource.org/wiki/উইকিসংকলন:লিপিশালা)

